

Komunike Upravnog odbora Vijeća za implementaciju mira

Upravni odbor Vijeća za implementaciju mira danas je održao sastanak na nivou ambasadora i razgovarao o pozitivnom razvoju situacije u vezi sa implementacijom Odluke Ustavnog suda Bosne i Hercegovine o konstitutivnosti naroda.

Upravni odbor pozdravlja historijski napredak koji su postigle Vlade i parlamentarne institucije u Republici Srpskoj i Federaciji Bosne i Hercegovine na provedbi Sporazuma Mrakovica-Sarajevo od 27. marta. Upravni odbor pozdravlja usvajanje ustavnih amandmana od strane Doma naroda Federacije i finaliziranje ustavnih amandmana u Republici Srpskoj, što će voditi ka punoj implementaciji Odluka Ustavnog suda BiH o konstitutivnosti naroda (broj 5/98) i Sporazuma Mrakovica-Sarajevo. Upravni odbor smatra pozitivnom činjenicu da je većina zastupnika u Zastupničkom domu Federacije BiH glasala za amandmane.

Upravni odbor u potpunosti podržava Odluke koje je danas proglašio Visoki predstavnik i kojim se otklonio ograničeni broj nedostataka koji bi spriječili punu implementaciju Sporazuma od 27. marta. Ovim Odlukama se ispravlja nekoliko nedostataka u amandmanima Republike Srpske i uklanja opstrukcionizam koji su u Federaciji BiH pokazale nacionalističke stranke. Ovo će omogućiti da se izbori održe na vrijeme, prema jasnim pravilima i potpuno u skladu sa revidiranim entitetskim ustavima.

Upravni odbor čestita onim političkim liderima u oba entiteta koji su inicirali i podržali proces postizanja Sporazuma Mrakovica-Sarajevo. Ova angažiranost većine političkih lidera u ovoj zemlji je dobrodošao znak jačanja političke odgovornosti zasnovane na kompromisu i pregovaranju – što predstavlja živi dokaz da ta odgovornost zaživljava u odgovornim krugovima na političkoj sceni u Bosni i Hercegovini. Upravni odbor također sa žaljenjem konstatira da su i SDA i HDZ zauzele nekonstruktivan stav u ovom procesu, što dovodi u pitanje njihovu opredijeljenost za evropsku budućnost Bosne i Hercegovine. Upravni odbor poziva sve stranke, uključujući SDA i HDZ, da u cijelosti podrže i unaprijede proces implementacije.

Upravni odbor poхvaljuje visokog predstavnika Wolfganga Petritscha i njegove saradnike za neumorne napore koje su uložili kako bi omogućili iznalaženje domaćih rješenja. Ovaj napredak predstavlja odlučujući korak naprijed u smislu demokratskog razvoja Bosne i Hercegovine i njene opredijeljenosti ka vladavini zakona. Ovo također dozvoljava Bosni i Hercegovini da se na svom putu ka evropskim integracijama ponovo koncentrira na goruća pitanja, kao što su ekonomska i socijalna reforma.